

NACRT

ZAKON
O ZAŠTITI PRAVA PRIPADNIKA NACIONALNIH MANJINA U BRČKO
DISTRIKTU BiH

Brčko, 2020. godine

Na osnovu člana 22. Statuta Brčko distrikta Bosne i Hercegovine – prečišćeni tekst („Službeni glasnik Brčko distrikta Bosne i Hercegovine“, broj 2/10) Skupština Brčko distrikta Bosne i Hercegovine na ___ redovnoj sjednici održanoj _____ 2020. godine
u s v a j a

ZAKON

O ZAŠTITI PRAVA PRIPADNIKA NACIONALNIH MANJINA U BRČKO DISTRIKTU BiH

POGLAVLJE I. OSNOVNE ODREDBE

Član 1. (Predmet Zakona)

(1) Ovim zakonom propisuju se prava i obaveze pripadnika nacionalnih manjina u Brčko distriktu BiH (u daljnjem tekstu: Distrikt), osnivanje i rad Vijeća nacionalnih manjina (u daljnjem tekstu: Vijeće), uspostavljanje Fonda za nacionalne manjine, zastupljenost u organima vlasti kao i obaveze organa vlasti u Distriktu prema pripadnicima nacionalnih manjina.

(2) Ovim zakonom je regulisano ostvarivanje prava pripadnika nacionalnih manjina koji su kao takvi definisani Zakonom o zaštiti prava pripadnika nacionalnim manjina BiH (u daljnjem tekstu: državni zakon).

Član 2. (Definicija nacionalne manjine)

Nacionalna manjina, u skladu s ovim zakonom, jeste dio stanovništva, državljana BiH, koji imaju prebivalište u Distriktu, a koji ne pripadaju nijednom od tri konstitutivna naroda, a sačinjavaju je ljudi istog ili sličnog etničkog porijekla, iste ili slične tradicije, običaja, vjerovanja, jezika, kulture i duhovnosti i bliske ili srodne historije i drugih obilježja.

Član 3. (Međunarodna zaštita)

Okvirna konvencija za zaštitu nacionalnih manjina Vijeća Evrope direktno se primjenjuje u Distriktu, a u skladu s članom 2 Ustava Bosne i Hercegovine.

Član 4. (Zabrana diskriminacije)

(1) Zabranjuje se svaki oblik diskriminacije, po svim osnovama propisanim Zakonom o zabrani diskriminacije BiH, prema nacionalnim manjinama i licima koja pripadaju nacionalnim manjinama.

(2) Nije dozvoljena prisilna asimilacija pripadnika nacionalnih manjina.

Član 5.

(Prava pripadnika nacionalnih manjina)

Pripadnicima nacionalnih manjina u Distriktu garantuje se i omogućava ostvarivanje prava na slobodu organizovanja mirnog okupljanja, slobodu udruživanja, slobodu izražavanja i slobodu misli, radi ispoljavanja i zaštite svojih kulturnih, vjerskih, tradicijskih, jezičkih, obrazovnih, socijalnih, ekonomskih i političkih sloboda, prava, interesa, potreba i identiteta, kao i ostala prava i slobode propisana Okvirna konvencija za zaštitu nacionalnih manjina Vijeća Evrope.

Član 6.

(Finansijska podrška)

(1) Distrikt finansijski podržava, u okviru svojih budžetskih sredstava, održavanje i razvoj odnosa između udruženja pripadnika nacionalnih manjina koja imaju registrovano sjedište na teritoriji Distrikta s pripadnicima udruženja nacionalnih manjina koja imaju registrovano sjedište u Republici Srpskoj, Federaciji Bosne i Hercegovine, te s drugim državama i narodima u njihovim matičnim državama.

(2) Distrikt osigurava, u okviru svojih budžetskih sredstava, sredstva radi ostvarivanja prava koja pripadaju pripadnicima nacionalnim manjinama na osnovu ovog zakona, kao i za aktivnosti udruženja pripadnika nacionalnih manjina.

Član 7.

(Fond za nacionalne manjine)

(1) Fond za nacionalne manjine (u daljnjem tekstu: Fond) se uspostavlja za podršku finansiranja programa i projekata čiji je cilj zaštita prava pripadnika nacionalnih manjina, očuvanje i promocija njihovih različitih kulturnih, etničkih, jezičkih, tradicionalnih i vjerskih identiteta te kulturnog naslijeđa.

(2) Osim za namjene predviđene u stavu (1) ovog člana, iz sredstava Fonda se finansira i rad Vijeća.

(3) Fond se finansira iz budžeta Distrikta.

(4) Kriteriji za podršku programima i projektima i način upravljanja Fondom se uređuje aktom Vlade Brčko distrikta BiH (u daljnjem tekstu: Vlada), a na prijedlog Odjeljenja za stručne i administrativne poslove (u daljnjem tekstu: Odjeljenje).

(5) Visinu sredstava Fonda predlaže Odjeljenje u prijedlogu budžeta za svaku kalendarsku godinu.

POGLAVLJE II. ZNAKOVI, SIMBOLI I UPOTREBA JEZIKA

Član 8.

(Znakovi i simboli)

(1) Pripadnici nacionalnih manjina mogu isticati i nositi znakove i simbole nacionalne manjine kojoj pripadaju, kao i njenih organizacija, udruženja i institucija.

(2) Prilikom upotrebe znakova i simbola, pripadnici nacionalnih manjina dužni su isticati službene znakove i simbole Distrikta.

Član 9.
(Upotreba jezika)

(1) Distrikt priznaje i štiti pravo svakom pripadniku nacionalne manjine da upotrebljava svoj manjinski jezik slobodno i bez ometanja, privatno i javno, usmeno i pismeno.

(2) Organi i institucije Distrikta dužni su omogućiti pripadnicima nacionalnih manjina da mogu podnositi usmene ili pismene zahtjeve, kao i obraćati se organima vlasti, na jeziku te nacionalne manjine.

(3) Pravo iz stava (1) ovog člana podrazumijeva i pravo pripadnika nacionalne manjine da upotrijebi svoje ime i prezime na jeziku manjine i da zahtijeva da kao takvo bude u javnoj upotrebi.

(4) Distrikt podstiče očuvanje jezika nacionalnih manjina na način da finansira organizovanje kurseva za učenje jezika nacionalnih manjina.

POGLAVLJE III. OBRAZOVANJE I STRUČNO USAVRŠAVANJE

Član 10.
(Osnivanje privatnih ustanova)

(1) Pripadnici nacionalnih manjina imaju pravo osnovati privatne ustanove za obrazovanje i stručno usavršavanje u skladu s ovim zakonom i zakonima iz oblasti obrazovanja Distrikta.

(2) Finansiranje privatnih ustanova iz stava (1) ovog člana dužni su osigurati osnivači privatnih ustanova.

Član 11.
(Dodatna nastava na jeziku manjine)

(1) Za pripadnike nacionalne manjine organizuje se dodatna nastava za učenje jezika, književnosti, historije i kulture u okviru predškolskog, osnovnog i srednjeg obrazovanja, pod uslovom da većina roditelja to zahtijeva i da je moguće osigurati kadrovske pretpostavke za izvođenje nastave.

(2) Kriteriji za organizovanje dodatne nastave iz stava (1) ovog člana utvrđuje šef Odjeljenja za obrazovanje.

(3) U svrhu izvođenja dodatne nastave iz stava (1) ovog člana osiguravaju se potrebna finansijska sredstva u budžetu Distrikta, na prijedlog Odjeljenja za obrazovanje, uz saglasnost Vlade.

POGLAVLJE IV. INFORMISANJE I KULTURA

Član 12.
(Osnivanje sredstava javnog informisanja)

(1) Pripadnici nacionalnih manjina u Distriktu imaju pravo na osnivanje radio i televizijskih stanica i izdavanje novina i drugih štampanih informativnih novina (u daljnjem tekstu: sredstva javnog informisanja), na jezicima manjina kojim pripadaju, u skladu s propisima iz te oblasti koji se primjenjuju u Distriktu.

(2) Sredstva javnog informisanja koja su osnovana i izdata u smislu stava (1) ovog člana, podršku za svoj rad mogu ostvariti putem programa i projekata koji se finansiraju iz Fonda.

Član 13. (Programski sadržaji)

(1) Javne radio i TV stanice čiji je osnivač Distrikt dužne su u svojim programskim shemama predvidjeti posebne emisije za pripadnike nacionalnih manjina, a mogu osigurati i druge sadržaje na jezicima manjina, u skladu s propisima Regulatorne agencije za komunikaciju.

(2) Upravni i redakcijski odbor dužan je osigurati učešće pripadnika nacionalnih manjina prilikom utvrđivanja programske sheme, koja se odnosi na nacionalne manjine.

(3) Privatne radio i TV stanice koje finansiraju svoje programske sadržaje dijelom iz budžeta Distrikta dužne su u svojim programima osigurati dio sadržaja za pripadnike nacionalnih manjina, u skladu s propisima Regulatorne agencije za komunikaciju.

Član 14. (Kultura)

Arhiv Distrikta, muzeji i ustanove za zaštitu spomenika kulture u Distriktu dužni su u svojim programima i sadržajima voditi računa o srazmjernoj zastupljenosti svih nacionalnih manjina u Distriktu i štititi spomeničko blago i kulturnu baštinu nacionalnih manjina.

POGLAVLJE V. UČESTVOVANJE U ORGANIMA VLASTI

Član 15. (Zastupljenost u organima vlasti)

(1) Izabrani zvaničnici kao predstavnici nacionalnih manjina u organima vlasti, predstavnici su svih nacionalnih manjina i dužni su štititi njihove interese.

(2) Pripadnici nacionalnih manjina iz člana 2. ovog zakona imaju pravo na zaposlenje u organima javne uprave i drugim institucijama Distrikta i javnim službama, u skladu sa Statutom Brčko distrikta BiH i propisima Distrikta koji regulišu oblast zapošljavanja.

Član 16. (Vijeće nacionalnih manjina)

(1) Vijeće je savjetodavno tijelo koje daje preporuke, mišljenja, savjete i prijedloge o pitanjima koja se odnose na prava pripadnika nacionalnih manjina, a čini ga po jedan predstavnik iz svake nacionalne manjine zastupljene u Distriktu.

(2) Predstavnici nacionalnih manjina imenuju se u Vijeće, na osnovu javnog poziva i kriterija, koje utvrđuje Skupština Brčko distrikta BiH (u daljnjem tekstu: Skupština) na prijedlog Komisije za zaštitu ljudskih prava (u daljnjem tekstu: Komisija).

- (3) Postupak izbora članova Vijeća provodi Komisija.
- (4) Na osnovu provedene procedure iz stava (2) i (3) ovog člana Skupština imenuje Vijeće koje sačinjava po jedan predstavnik iz svake nacionalne manjine zastupljene u Distriktu.
- (5) Mandat članova Vijeća traje četiri godine s pravom obnavljanja mandata samo jednom.
- (6) Članovi Vijeća imaju pravo na naknadu za rad u visini do iznosa jedne prosječne neto plate isplaćene u Brčko distriktu BiH za prethodnu godinu.
- (7) Vijeće donosi Poslovnik o radu kojim se uređuje način izbora predsjedavajućeg i zamjenika predsjedavajućeg Vijeća, pravo članova Vijeća na naknadu za rad i visinu naknade, način odlučivanja i sazivanja sjednica, kao i druga pitanja od značaja za rad Vijeća.
- (8) Vijeće donosi Poslovnik o radu natpolovičnom većinom od ukupnog broja članova, uz prethodno dobijenu saglasnost Komisije.

Član 17. (Nadležnosti Vijeća)

Vijeće nacionalnih manjina ima sljedeće nadležnosti:

1. daje preporuke i mišljenja na programe i projekte koji se odnose na prava pripadnika nacionalnih manjina;
2. izjašnjava se na nacрте zakona i drugih propisa koji se odnose na prava pripadnika nacionalnih manjina;
3. daje preporuke za rješavanje pitanja koja se odnose na ostvarivanje prava pripadnika nacionalnih manjina;
4. priprema i podnosi Vladi i Skupštini periodične izvještaje o statusu prava pripadnika nacionalnih manjina u Distriktu;
5. sarađuje i koordinira s državnim i entitetskim institucijama koja se odnose na ostvarivanje prava pripadnika nacionalnih manjina;
6. organizuje aktivnosti za podizanje svijesti o zaštiti i unapređenju prava pripadnika nacionalnih manjina i jača dijalog s udruženjima nacionalnih manjina;
7. daje preporuke za finansiranje programa i projekata iz Fonda usmjerenih na zaštitu prava pripadnika nacionalnih manjina;
8. obavlja i druge poslove iz oblasti zaštite prava pripadnika nacionalnih manjina;
9. prikuplja podatke o identifikaciji pripadnika nacionalnih manjina.

Član 18. (Nadzor)

Nadzor nad primjenom ovog zakona vrše Odjeljenje za stručne i administrativne poslove i Odjeljenje za obrazovanje, svako iz svoje nadležnosti.

POGLAVLJE VI. KAZNENE ODREDBE

Član 19. (Kaznene odredbe)

Izazivanje nacionalne, rasne i vjerske mržnje, razdora ili netrpeljivosti, a koje se mogu dovesti u vezu s odredbama ovog zakona, kažnjava se u skladu s Krivičnim zakonom Brčko distrikta Bosne i Hercegovine.

POGLAVLJE VII. PRELAZNE I ZAVRŠNE ODREDBE

Član 20. (Primjena drugih propisa)

Na pitanja koja nisu regulisana ovim zakonom neposredno se primjenjuje Zakon o zaštiti prava pripadnika nacionalnih manjina Bosne i Hercegovine.

Član 21. (Usklađivanje drugih propisa s ovim zakonom)

(1) Šef Odjeljenja za obrazovanje dužan je u roku od šest mjeseci od dana stupanja na snagu ovog zakona donijeti kriterije za organizovanje dodatne nastave iz člana 11. stav (2) ovog zakona.

(2) U roku od šest mjeseci od dana stupanja na snagu ovog zakona, Skupština imenuje Vijeće.

Član 22. (Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko distrikta BiH“.

PREDSJEDNIK SKUPŠTINE

Esed Kadrić

OBRAZLOŽENJE

PRAVNI OSNOV ZA DONOŠENJE ZAKONA

Pravni osnov za donošenje Zakona o zaštiti prava pripadnika nacionalnih manjina u Brčko distrikta Bosne i Hercegovine sadržan je u članu 22. Statuta Brčko distrikta Bosne i Hercegovine („Službeni glasnik Brčko distrikta BiH“, broj 2/10).

RAZLOZI ZA DONOŠENJE ZAKONA

1. Analiza sadašnjeg stanja

Osnovni problem i nezadovoljstvo postojećim stanjem nalaze se, prije svega, u činjenici da zakonodavni okvir Brčko distrikta BiH, kao specifične administrativne jedinice lokalne samouprave sa zakonodavnim kapacitetom, nema vlastiti Zakon o zaštiti prava pripadnika nacionalnih manjina, dok je na drugim nivoima vlasti u Bosni i Hercegovini usvojen zakonski okvir koji uređuje materiju zaštite prava nacionalnih manjina (na državnom i entitetskim nivoima). Na osnovu iskazanih potreba nacionalnih manjina na području Brčko distrikta BiH i nekoliko apela Ministarstva za ljudska prava i izbjeglice Bosne i Hercegovine, potrebno je navedenu materiju urediti zakonom i na nivou Brčko distrikta BiH, odnosno urediti je potpunije u odnosu na krovni Zakon o zaštiti prava pripadnika nacionalnih manjina Bosne i Hercegovine, što je i svojevrsna obaveza prema članu 7. navedenog zakona, te je prilagoditi specifičnim prilikama i položaju nacionalnih manjina u Brčko distriktu BiH. Dalji problem je što nepostojanjem Zakona o zaštiti prava pripadnika nacionalnih manjina na području Brčko distrikta BiH nije upotpunjen pravni okvir u Bosni i Hercegovini u pogledu zaštite prava pripadnika nacionalnih manjina. U Brčko distriktu BiH ne postoji ni posebno savjetodavno tijelo koje bi se bavilo promovisanjem i zaštitom prava pripadnika nacionalnih manjina, kao ni propisana obaveza na nivou Brčko distrikta BiH o međuinstitucionalnoj saradnji, saradnji na nivou Brčko distrikta BiH, države BiH i entiteta u pogledu zaštite i promocije prava pripadnika nacionalnih manjina. Osim toga, na posebnom i pojedinačnom nivou problem nepostojanja zakona o zaštiti prava pripadnika nacionalnih manjina na nivou Brčko distrikta BiH ima za posljedicu da Brčko distrikt BiH u svojim zakonodavnim kapacitetima nije u potpunosti uredio prava i obaveze u smislu nacionalnih manjina na svom području, niti ih prilagodio specifičnostima nacionalnih manjina i pravno-političkom sistemu Brčko distrikta BiH i to u sljedećim oblastima: jasnog definisanja pojma pripadnika nacionalne manjine na području Brčko distrikta BiH; definisanja i upotpunjavanja osnovnih prava, sloboda i obaveza pripadnika nacionalnih manjina i to: prava na samoopredjeljenje – izjašnjavanje kao pripadnika jedne od definisanih nacionalnih manjina; zabrane prisilne asimilacije; prava na slobodu organizovanja i okupljanja; slobode izražavanja, ostvarenja vjerskih sloboda; prava na upotrebu jezika i pisma nacionalne manjine u javnom i privatnom životu; prava na osnivanje i vođenje vlastitih privatnih institucija za obrazovanje i stručno usavršavanje te uspostave dodatne nastave na jeziku manjine u svrhu učenja jezika, književnosti, historije i kulture nacionalne manjine; ekonomsko-socijalnih prava; prava na kulturno izražavanje nacionalne manjine kroz normativnu mogućnost uspostave kulturnih institucija od strane nacionalnih manjina; obaveze zaštite spomenika i kulturne baštine nacionalnih manjina od strane Brčko distrikta BiH; osiguravanja građanskih i političkih prava nacionalnih manjina – zastupljenost u organima vlasti i drugim javnim službama na svim nivoima vlasti u Distriktu; mogućnost da se pod zakonskim kriterijima osiguraju određena finansijska sredstva u kontekstu promocije i zaštite prava nacionalnih manjina; mogućnost da se osigura stručno-administrativna podrška i kancelarijski prostor u svrhu zaštite prava nacionalnih

manjina, kao i nepotpunost uslova za jednak tretman nacionalnih manjina na području Brčko distrikta BiH.

2. Problemi koje propis treba da riješi

Donijeti Zakon o zaštiti prava pripadnika nacionalnih manjina u Brčko distriktu BiH na način da se nadogradi i upotpuni temelj zaštite prava i sloboda nacionalnih manjina iz Zakona o zaštiti prava pripadnika nacionalnih manjina Bosne i Hercegovine, te uredi pitanje prava, sloboda i obaveza nacionalnih manjina na području Brčko distrikta BiH u skladu sa specifičnim prilikama i položajem nacionalnih manjina u Brčko distriktu BiH i političko-pravnim okvirom Brčko distrikta BiH.

Da se donošenjem predmetnog zakona na nivou Brčko distrikta BiH upotpuni pravni okvir na području Bosne i Hercegovine jer je Brčko distrikt BiH jedina politička jedinica sa zakonodavnim kapacitetom u Bosni i Hercegovini koja nema usvojen zakon u kontekstu ove materije.

Da se uspostavi posebno savjetodavno tijelo u formi Vijeća nacionalnih manjina, a koje bi sačinjavali predstavnici nacionalnih manjina, s propisanim načinom izbora i kriterijima za članstvo u Vijeću, a koje bi se bavilo promovisanjem i zaštitom prava nacionalnih manjina na području Brčko distrikta BiH.

Da se uspostave mehanizmi na nivou Brčko distrikta BiH o međuinstitucionalnoj saradnji, saradnji na nivou Brčko distrikta BiH, države BiH i entiteta u pogledu zaštite i promocije prava i sloboda pripadnika nacionalnih manjina.

Da se normira obaveza i kriteriji finansiranja rada udruženja pripadnika nacionalnih manjina, institucija osnovanih od strane pripadnika nacionalnih manjina te drugih vidova kroz koja se ostvaruju prava i slobode nacionalnih manjina, kao i mogućnost da se osigura stručno-administrativna podrška i kancelarijski prostor u svrhu zaštite/promocije prava i sloboda pripadnika nacionalnih manjina te upotpune uslovi za jednak tretman nacionalnih manjina na području Brčko distrikta BiH.

Na posebnom i pojedinačnom nivou donošenja Zakona o zaštiti prava pripadnika nacionalnih manjina, urediti sljedeća pitanja: jasno definisati pojam nacionalne manjine na području Brčko distrikta BiH; definisati osnovna prava, sloboda i obaveze nacionalnih manjina na području Brčko distrikta BiH u smislu prava na samoopredjeljenje – izjašnjavanje kao pripadnika jedne od definisanih nacionalnih manjina; zabrane prisilne asimilacije; prava na slobodu organizovanja i okupljanja; slobode izražavanja, ostvarenja vjerskih sloboda; prava na upotrebu jezika i pisma nacionalne manjine u javnom i privatnom životu; prava na osnivanje i vođenje vlastitih privatnih institucija za obrazovanje i stručno usavršavanje te uspostave dodatne nastave na jeziku manjine u svrhu učenja jezika, književnosti, historije i kulture nacionalne manjine; zaštita ekonomsko-socijalnih prava pripadnika nacionalnih manjina; prava na kulturno izražavanje nacionalne manjine kroz normativnu mogućnost uspostave kulturnih institucija od strane nacionalnih manjina; obaveze zaštite spomenika i kulturne baštine nacionalnih manjina od strane Brčko distrikta BiH; osiguravanja građanskih i političkih prava nacionalnih manjina – zastupljenost u organima vlasti i drugim javnim službama na svim nivoima vlasti u Distriktu.

Dio definisanih problema bio bi riješen samim stupanjem na snagu Zakona (u pogledu potpunosti pravnog sistema Bosne i Hercegovine u kontekstu materije zaštite prava

pripadnika nacionalnih manjina, potpune regulative o pravima, slobodama i obavezama pripadnika nacionalnih manjina na području Brčko distrikta BiH prilagođenih položaju i specifičnostima nacionalnih manjina u Brčko distriktu BiH te političko-pravnom okviru Brčko distrikta BiH), dok bi se dio definisanih problema riješio daljnjom implementacijom samog zakona (administrativna, finansijska i druga podrška u praksi, učešće u javnim službama, osnivanje posebnih ustanova za zaštitu prava i sloboda nacionalnih manjina, uspostava Vijeća nacionalnih manjina), za šta bi okvirni vremenski period bio jedna do dvije godine po stupanju na snagu predmetnog zakona.

3. Ciljevi koji se postižu propisom

Cilj zakona je da se osigura ostvarivanje posebnih prava pripadnika nacionalnih manjina, a koja su neophodna za zaštitu različitog identiteta nacionalnih manjina kao bitnog dijela integrisanog društva uz garanciju nediskriminacije i njihove potpune jednakosti pred zakonom.

4. Razmatranje mogućnosti da se problem riješi i bez donošenja zakona

Bez donošenja predmetnog zakona nije moguće riješiti problem.

5. Vrijednosti kojima se obrađivač vodio i trenutna politika date institucije u vezi s njima

Prijedlog nacrta Zakona je urađen u skladu s Odlukom o odobravanju Smjernica za izradu nacrta zakona o zaštiti prava pripadnika nacionalnih manjina.

7. Vjerovatnoća budžetskih prihoda od uvođenja propisa, zasnovana na realnoj procjeni djelotvornosti date institucije

Budžetske implikacije će biti prikazane u mišljenju Direkcije za finansije Brčko distrikta BiH.

USKLAĐENOST PROPISA S PRAVNOM STEČEVINOM EU

Postupak usklađivanja će se provesti nakon okončanja postupka dostavljanja komentara i mišljenja organa javne uprave i institucija Brčko distrikta BiH.

OBJAŠNJENJE OSNOVNIH PRAVNIH INSTITUTA I POJEDINAČNIH RJEŠENJA

- Članom 1. propisuje se predmet zakona;
- Članom 2. se daje definicija nacionalnih manjina;
- Članom 3. propisuje se međunarodna zaštita;
- Članom 4. propisuje se zabrana diskriminacije;
- Članom 5. uređuju se prava pripadnika nacionalnih manjina;
- Članom 6. propisuje se finansijska podrška;
- Članom 7. propisuje se uspostavljanje Fonda za nacionalne manjine;
- Član 8. uređuje znakove i simbole;
- Članom 9. propisano je pravo na upotrebu jezika;
- Članom 10. propisano je osnivanje privatnih ustanova;

- Članom 11. je propisana dodatna nastava na jeziku manjine;
- Članom 12. je propisano pravo osnivanje sredstava javnog informisanja;
- Članom 13. je propisana obaveza javnih i privatnih TV-stanica u pogledu programskih sadržaja;
- Članom 14. je propisana dužnost zaštite spomeničkog blaga i kulturne baštine nacionalnih manjina;
- Članom 15. je propisano pravo na zastupljenost u organima vlasti;
- Članom 16. je propisano osnivanje Vijeća za nacionalne manjine;
- Članom 17. je propisana nadležnost Vijeća za nacionalne manjine;
- Članom 18. je propisano ko vrši nadzor nad primjenom zakona;
- Članom 19. su propisane kaznene odredbe;
- Članom 20. je propisana primjena drugih propisa;
- Članom 21. je propisano usklađivanje drugih propisa Distrikta s predmetnim zakonom;
- Članom 22. je propisano kad zakon stupa na snagu.

PROVEDBENI MEHANIZMI I NAČIN OSIGURAVANJA POŠTOVANJA ZAKONA

Predlagač zakona procjenjuje da će odgovorne osobe osigurati poštovanje zakona.

OPĆI INTERES ZBOG KOJEG SE PREDLAŽE POVRATNO DJELOVANJE

Ne predlaže se povratno djelovanje.

RAZLOZI ZBOG KOJIH SE PREDLAŽE DA ZAKON STUPI NA SNAGU PRIJE OSMOG DANA OD DANA OBJAVLJIVANJA U „SLUŽBENOM GLASNIKU BRČKO DISTRIKTA BiH“

Ne predlaže se stupanje na snagu prije osmog dana od dana objavljivanja u „Službenom glasniku Brčko distrikta BiH“.

KONSULTACIJE MEĐU INSTITUCIJAMA

Direkcija za finansije Brčko distrikta BiH je dopisom broj: 02-04.1-502/20 od 30. 6. 2020. godine dostavila mišljenje da zakon može ići u daljnju propisanu proceduru, uz obavezu Distrikta da budžetska sredstva planira u redovnoj proceduri usvajanja i donošenja budžeta.

Pravobranilaštvo Brčko distrikta BiH je svojim dopisom broj: M-583/20 od 3. 7. 2020. godine dostavilo mišljenje da nema smetnji da se prijedlog nacrta zakona proslijedi u daljnju proceduru.

Odjeljenje za evropske integracije i međunarodnu saradnju dostavilo je Mišljenje o usklađenosti broj: 02-000173/20 od 8. 7. 2020. godine.

Prijedlog nacrta zakona proslijeđen je na komentare svim relevantnim udruženjima, a komentare je dostavilo udruženje „Savez nacionalnih manjina Brčko distrikta BiH“, koji su prihvaćeni.

Zakonodavni ured je dostavio komentare od kojih su svi prihvaćeni.